

2019

AÑA DI FAMILIA
Y DI CUIDO DI NOS
MUCHANAN

ISLA(•)NLINE

Diamars 29 January 2019

Email: prensa@arubagovernment.aw Tel: 528-4900



GOBIERNO DI ARUBA

Noticia di Gobierno



"Disfruta di nos
dushi Carnaval"

Isla Online



MINISTER EVELYN WEVER-CROES

Prome Minister di Aruba



E situacion na Venezuela ta trece hopi preocupacion. Esaki ta un topico cu tin e atencion di Gobierno desde cu e problemanan di nos pais bisiña a cuminsa escala. Gobierno di Aruba ta siguiendo e desaroyonan di cerca y nos ta den estado di alerta pa cualkier eventualidad cu por tuma luga. Prome Minister a duna di conoce varios puntonan pa cua Aruba ta den estado di alerta.

-Gobierno na e momentonan aki ta mas alerta y atento riba nos fronteranan.

-Nos ta den estado di alerta riba e impacto internacional y e posicion di Hulanda den e asuntonan aki.

-E buelonan entre Aruba y Venezuela tambe ta un motibo di preocupacion cu ta pone nos den estado di alerta. Nos no kier e situacion na unda fronteranan mester worde cera y Arubanonan keda pega na Venezuela. Prome Minister a indica cu e conseho di biahe di Reino ta pa no bay Venezuela si no tin nada di haci eynan. Na e momentonan aki, Venezuela no ta un luga pa pasa vakantie. Ainda no tin prohibicion pero e conseho di Reino ta pa evita di bay Venezuela.

-E di cuatro punto preocupante ta e tema di evacuacion di nos hendenan. Esaki ta algo cu Aruba so no por haci. Esaki ta un plan cu mester wordo haci riba tereno di Reino cu lo tuma su tempo. Pa e motibo aki tambe, desde aña pasa a haci apelacion na tur esnan cu ta biaha pa Venezuela, pa nan registra na embahada Hulandes na Caracas. Especialmente Arubanonan cu ta biba na Venezuela, pa nan registra na e embahada pa si acaso e situacion yega asina leu cu mester evacua, nos hendenan ta riba e lista registra.

Prome Minister a enfatisa cu loke cu ta sosodiendo na Venezuela ta pone cu tur luz di alerta ta cende poniendo Aruba den estado di alerta siendo nos un pais hopi cerca di Venezuela.



VARIOS PUNTO
CU TA PONE ARUBA DEN
ESTADO DI ALERTA:

E CONSEHO DI BIAHE
DI **REINO**
TA KEDA PA
EVITA DI BAY
VENEZUELA



Prome Minister Evelyn Wever-Croes: Muchanan mester wordo encurasha pa ta determina pa logra cosnan grandi: **TIN UN BETICO DEN CADA MUCHA**

Awo cu Dia di Betico ta tras di lomba, y despues di tur e eventonan cu a tuma luga na Aruba na honor di nos Libertador Betico Croes, Aruba ta sinti un aire fresco cu nos pueblo no ta lubida e gran lucha di Betico Croes cu awe nos tin un Status Aparte.

Prome Minister Evelyn Wever-Croes, como costumber di tur aña, a haci su recorido na algun scol den districtonan di Aruba, y a keda hopi conmovi y agradablemente impresiona

pa con e scolanan a prepara nan mes pa Dia di Betico como tambe e manera cu nos muchanan ta expresa di Betico Croes.

Nos ta den Aña di Famia y cuido di nos muchanan. Y pa esaki, Prome Minister a tuma tempo pa encurasha cada mucha pa ta mescos cu Betico, determina pa logra cosnan grandi.

Prome Minister: "Den cada mucha di Aruba tin un Betico. Sea mucha homber of mucha

muher. Na e edad cu Betico tawata bay scol basico, e tawata ta tambe un mucha regular, comun y coriente kende a nace den un famia humilde y den un barrio cu e tempo aya no tawata ofrece hopi oportunidad. Sinembargo, Betico a demostra e tempo ey caba un determinacion enorme pa logra su meta. Semper el a muestra un curashi grandi y un amor inmenso pa Aruba. Y esaki, pa mi ta e tres elementonan cu nos mester siña nos muchanan pa nan

corda riba Betico y inspira nan cu loke cu nan pone den nan mente, cu determinacion, curashi y amor nan por logra, sin laga niun hende desvia nan di nan meta".

Prome Minister a gradici tur docente pa e esfuerso cu nan a hinca den e preparacionnan pa Dia di Betico y e informacionnan cu nan ta pasa na nos muchanan. Na tur scol bishita, muchanan tawata tin hopi conocimiento di e bida y e importancia di e lucha di Betico.




 MINISTRE OTMAR ODUBER

Minister di Desaroyo Teritorial, Infraestructura y Medio Ambiente

Dia 2 di februari ta “World Wetlands Day 2019” WETLANDS TA ESENCIAL PA PROTECCION CONTRA CAMBIO CLIMATOLOGICO

Cada aña ta celebra “World Wetlands Day” (WWD) riba 2 di februari recordando e beneficianan cu nan ta prove, e beneficianan ta encera, awa pa bebe, awa pa agricultura, biodiversidad cu nos ta depende riba dje, recreacion/atracion, oportunidad turistico y cultural yroteccion contra impacto di cambio di clima cu ta mas frecuente y intense. E tema di WWD di e aña aki ta: “Wetlands and Climate Change”.

En conexion cu e dia aki, Ministerio encarga cu Desaroyo Teritorial, Infraestructura y Medio Ambiente ta haye sumamente importante pa trece luz riba e importancia di e dia aki.

Tur aña riba e fecha aki ta conmemora firmamento di tratado di Ramsar na e ciudad Iranes Ramsar den aña 1971. Den cuadro di esaki tur aña ta scohe un tema di enfoke. E aña aki e tema di conscientisacion tin un enfoke fuerte riba e aspecto di cambio di clima cu ta tumando lugamundialmente y e consecuencia cu esaki tin pa paisnan.

Kico ta Wetland?

Un Wetland ta un area/tereno cu ta satura cu awa, sea permanente of durante cierto temporada of ta inunda frecuentemente. Wetlands ta absorbe awa den tempo di hopi yobida y proteha nos costanan contra mal tempo

Un Wetland/ Saliña ta un area

extremadamente valioso pa nos medio ambiente pa diferente motibo: Reducion di inundacion den e areanan aki (por ehempel: corda situacionnan di inundacion den pasado den area di Palm Beach Noord).

Tambe biodiversidad y area na unda hopi especie di Aruba pero tambe pafo di Aruba ta bishita y biba y flora y fauna) Wetlands ta promove bienestar di e ciudadano y ta mehora calidad di aire den area cu un densidad di poblacion halto. E combinacion di nos rooi nan, tankinan, saliñanan, Bubali Plas y Spaans Lagoen ta forma base di e infraestructura ‘muha’ di Aruba. Awa no ta yobe tur ora na Aruba, sinembargo ora cu awa yobe e ta basha hopi den un tempo relativamente corto, cual sa causa inundacionnan. Den e caso aki e funcion di e areanan menciona ta pa gara y maneha e capacidad di awa (manera un spons). Tin diferente tipo di saliña na diferente sitio y como tambe den area mas popula manera area di hotel.

Mundialmente paisnan cu ta wordo considera rico y cu ta den adelanto, ta paisnan cu banda di e importancia di e aspecto economico, ta enfoca tambe riba biodiversidad di e medio ambiente. Realidad ta cu e crecimiento di poblacion, urbanisacion y necesidad di espacio, careteranan entre otro, ta pone hopi presion



riba e infraestructura acuatico rond mundo y na Aruba tambe. Considerando e reto

aki, ta importante pa crea conscientisacion tocante e balor di e areanan aki.

Dia 4 di februari lo tin apertura oficial

TRABOUNAN NA CARNIVAL VILLAGE SAN NICOLAS TA ON SCHEDULE!

Dos siman pasa Minister Otmar Oduber encarga cu Desaroyo Teritorial, Infrastructuray Medio Ambiente conhuntamente cu representante di SMAC, Musica, San Nicolas Business Association, DOW y contratista a anuncia e proyectonan tumando luga na Carnival Village. Esnan cu ta frecuenta San Nicolas por aprecia e trabounan duro tumando luga pa logra finalisa cu e prome fase, prome cu e festival di Caiso & Soca Monarch cu lo tuma luga na e sitio. E apertura lo ta dia 4 di februari, e prome anochi di pre final di Caiso and Soca Monarch. Conhuntamente cu Minister di Cultura, ta invita henter comunidad di Aruba, specialmente musiconan y nan famia pa asisti e dedicacion aki combinando pasado cu presente. Dunando honor na un di e actividadnan cultural di mas grandi na Aruba.

Den e conferencia di prensa Minister Oduber a splica cu Gobierno a percura pa pone mas cu poco mas cu 1 mion florin disponibel for di aña pasa pa e proyecto. E proyecto ta reparti den diferente fase cu ta encera un stage multi funcional unda cu SMAC y Musica lo tin oficina cu espacio pa opera manera cu tabata e intencion inicial cu Carnival Village. Cu e desaroyonan aki no lo uza Carnival Village solamente algun biaha pa aña cu mayoria bes ta den temporada di Carnaval, sino cu e por ta activo pa diferente otro actividadnan henter aña.

Ya caba comunidad por aprecia e 'cara' di Carnival Village cual ta trata di e mural di homenahe na personanan/figuranan grandi di Calypso y Roadmarch di pasado.

Despues di e periodo di carnaval lo traha riba dos otro fase cualnan ta construcion

di 6 kiosko (tres cada banda). E kioskonan aki tambe lo por sirbi comunidad henter aña y lo por huur esaki via Directie Infrastructuur en Planning (DIP), mescos cu ta tuma luga na linear park na playa. Lo crea facilidad di baño tambe pa por duna e servicio aki tambe henter aña. E desaroyonan aki ta significa cu lo no mester di tent mas pasobra lo tin kiosko y lo tin baño den Carnival Village mes. E trabounan aki ta planifica pa termina final di juni pa despues cuminsa cu planificacion di e stage y oficinanan, Minister Oduber a splica.

Pa conclui, ta gradici Gabinete Wever – Croes, DOW y tur trahando riba e proyecto pa por logra realisa esaki den e forma mas rendabel cu ta posibel.



MINISTER XIOMARA RUIZ-MADURO

Minister di Finansa, Asuntonan Economico y Cultura



GOBIERNO TA EXTENDE E MORATORIO RIBA ESTABLECIMIENTO DI SUPERMERCADO NOBO CU DOS AÑA

Den e conferencia di prensa semanal di Gobierno, Minister di Finansa, Asuntonan Economico y Cultura a informa cu Gobierno ta extende e moratorio riba establecimiento di supermercado cu dos aña. E mandatario a subraya cu actualmente tin un moratorio existente riba supermercado cu ta termina dia 23 di mei 2019.

Departamento di Asuntonan Economico a tuma e iniciativa pa haci un estudio uzando diferente metodologianan den e ultimo kwartaal di 2018, pa asina por bin cu un recomendacion pa Gobierno. Den e resultado di e estudionan haci ta constata cu tin un total di 187 supermercado riba Aruba; esaki ta inclui tambe e mini marketnan den bario.


Pa haña un mihor bista a uza Aruba su GIS (Geographical Information System) unda a parti nos Pais den region y zones y a haci un analisis di cuanto supermercado tin den cada region. E regionnan Oranjestad West y Oranjestad Oost cu cada uno 39 supermercado, ta e regionnan cu tin mas tanto supermercado. Region di Noord y Tanki Leendert ta sigui cu un cantidad di 36 supermercado. Den e tabel adhunto por haya un bista di cuanto supermercado tin den cada region.

Departamento di Asuntonan Economico tambe a haci un poll y un encuesta atravez

di Facebook pa haya sa opinion di ciudadanonan pa sa kico nan ta pensa tocante

cu si tin 'di mas' of 'di menos' supermercado den nan bario.

Resultado di GIS



REGION #	REGION NAME(S)	# super-markets
1	NOORD/TANKI LEENDERT	36
2	ORANJESTAD-WEST	39
3	ORANJESTAD-EAST	39
4	PARADERA	20
5	SANTA CRUZ	16
6	SAVANETA	19
7	SAN NICOLAS-NOORD	10
8	SAN NICOLAS-SOUTH	8
		187

Resultado di encuesta

- Departamento di Asuntonan Economico tambe a haci un encuesta atravez di Facebook pa haña sa opinion di ciudadanonan pa sa kico nan ta pensa tocante cu e supermercadonan den nan bario.
- Den e encuesta haci, un di e resultadonan cu a sobresali ta, **74.5%** di e participantenan a indica cu no tin espacio pa mas supermercado den nan bario.

Continuacion Pagina 6

Di un total di 1.800 persona cu a participa, 94% a bisa cu nan kier menos supermercado riba Aruba. Den e encuesta haci, un di e resultado cu a sobresali, 74.5% di e participantenan a indica cu no tin espacio pa mas supermercado den nan barrio.


A base di e resultadonan di e estudionan haci, Departamento di Asunto Economico a recomenda Gobierno pa extende e moratorio riba supermercado cu dos aña mas. Esey ta nifica cu pa e proximo dos añanan lo no duna permiso pa establece supermercado y/of minimarket nobo na Aruba.



Conclusion

- Mirando e resultadonan di analisis haci den e estudio, ta recomenda pa extende e moratorium cu dos aña desde 23 di mei 2019 te cu 23 mei 2021.
- Mientras tanto un grupo di trabao lo wordo apunta pa a base di e resultadonan menciona y den cuadro di e ROP, establece reglanan pa determina un desaroyo di supermercadonan cu ta mas sostenibel, cu ta beneficia e consumidor y crea un competencia sano di e mercado den futuro.

Resultado GIS (Geographical Information System)





MINISTER GLENBERT F. CROES

Minister di Asunto Social y Labor

BUSCANDO TRABAO?

Si bo ta interesa pa solicita pasa libremente di dialuna pa diabierna entre 7:30 cu 11:00 am na DPL Seroe Blanco 4.

Mester acudi cu Cedula of un papel di Censo di fl.5,- pa wordo atendi. #dplaruba

Nos TEAM ta cla pa yudabo haya un Entrevista Laboral!



Oportunidad pa Trabou Solicita na DPL

Julio's Corner: Cook Helper
Crown Furniture & More: Technico den Refrigeracion
Burbujas Laundry: Laundry Attendant
Top Men Barbershop: Barbero
Azzurro NV (Garden Fresh): Counter Clerk - Sales Person
Stabia Aruba NV (Amore Mio): Dishwasher - Pick up waitress - Busser
RMC Jewelry Repair Shop: Goudsmid
Tatami Sushi Bar: Sushi Chef
Tango Travel: General Manager
El Tesoro Take Away Snack: Kok
Taishan Bar Restaurant & Nightclub: Kok
Gianni's Restaurant: Night Cleaner - Kitchen Helper
Daniel Steakhouse: Waiter
Azzurro NV (Azzurro): Cashier
Azzurro NV (Garden Fresh): Cleaner
D Chamo Barbershop: Kapper/ster

Pika's Corner Aruban Cuisine & Bar: Cleaner
Arends Inspection: NDE Consultant
Optica Sun Specs: Optometrist - Optical Lab Assistant
Garota Skin Care: Quiropedia
Gem Painting and Services: Auto Body Technician
Chengs Supercenter NV: Freezer Attendant - Slager
The New Garage: Banden Repareteur - Schoonmaker/ster
Dufry Aruba NV: Shift Supervisor
Sultan Restaurant: Bakker
Arubaanse Luchtvaart Maatschappij: Engineering Manager
New Tire Repair Shop: Tire Repair
Nice Cream Parlor: Waitress
Renaissance Aruba Resort & Casino: Sous Chef - Houseman

Sun & Shade: Optometrist
Sanirumba Production: Production Assistant
Kristies Jewels: Gemologist
Dragon Rich Bar Restaurant: Kok
Big He's Restaurant: Kok
Gran Victoria Bar Restaurant: Kok



Servicio di Abogado Liber

Duna carchi Abogado Liber cu ta consisti di:

1. Carchi Pro Deo
2. Prueba di menos y of ningun recurso.

Otro servicionan:

- Duna informacion/conseho huridico.
- Intermedia/atende cu por ehempel caso di labor.
- Referi e cliente sea pa seccion Guia Social y/of Bida & Famia.
- Traha diferente peticion huridico pa cliente.

**Pa mas
informacion
yama
528-1160**



Departamento di Asunto Social


MINISTER ANDIN BIKKER
Minister di Husticia, Seguridad y Migracion

TA BAY PIDI CASTIGO MAS SEVERO PA ESUNNAN CU HINCA DEN NAN CABES PA HACI ANUNCIO FALSO DI BOM NA AEROPUERTO OF RIBA AVION



Den ultimo simannan Aruba a experencia diferente anuncio di bom falso sea ta na Aeropuerto of riba avion. Dialuna ultimo, atrobe tabatin otro menasa di bom cu a haci cu mester a cera aeropuerto y ningun avion por a baha of lanta vuelo. Minister di Husticia mr. Andin Bikker ta lamenta e menasanan di bom pasobra Aruba ta biba di turismo y grandemente ta depende di esaki.

Den conseho di minister ta deliberando riba e pasonan cu mester tuma pa evita cu esaki sigui pasa. Den conferencia

di prensa diamars mainta tanto Minister di Husticia mr. Andin Bikker como Minister di Transporte y Comunicacion Sr. Chris Romero a trece dilanti nan preocupacion pa e situacion. Segun Minister Bikker, despues di a haci algun investigacion a dicidi di tuma diferente decision y diamars mes lo tuma algun adicional.

Den e reunion di conseho di minister, Minister Bikker lo bay duna algun proposicion pa cierto cambio den ley di codigo penal cu ta regarda diferente articulo. E numbernan ta 283, 284, 372 y si adicional mester

bin cu articulan nobo lo bin cu nan tambe segun e mandatario. E numbernan menciona ta e articulan cu ta regarda ora un persona ta haci un aviso falso di bom of ta laga un artefacto atras pa crea un impresion falso of haci uzo di un number di alarma pa duna un menasa falso.

Tur esakinan ta casonan cu a pasa den e ultimo simannan aki na Aruba. Segun Minister Bikker, e sondeo huridico cu el a haci, por a ripara cu obviamente na 2014 ora cu a introduci e codigo penal nobo, no a para keto na e articulan

aki. Basicamente a copia e articulan di tanto straf como boet cu ta aplicabel den Reino Hulandes y Hulanda y no a pensa pa bin cu castigo mas severo.

Mirando cu e ultimo simannan a drenta diferente anuncio falso di bom cu ta algo sin precedente y cu gobierno ta condena, ta bay pidi den conseho di minister pa hisa e castigo y boetnan hopi mas severo ora un persona hinca den su cabezas pa haci un acto asina segun Minister Bikker.

C65 update: Un parada di aplaudi! 0 DETENCION PA PARADA DI BLAAS 2019

Diadomingo nos muchanan a sa di gosa na di un bunita parada di Blaas na San Nicolaas.

Cuerpo Policial conhuntamente cu SMAC y e organisadornan a sa di saca e parada pa 1or di merdia.

Cuerpo policial a sa di pone mas o menos 100 polis riba pia conhuntamente cu personal di CEA.

E cabez di e parada a jega pa 4:55 pm na Joe Laviest y e ultimo grupo pa 5:35 pm.

Nos di Cuerpo Policial ta contento mirando cu tabta tin 0 detencion. Aña pasa nos a conta cu 3 detencion.

Cuerpo Policial ta satisfecho cu e resultado aki.





CARNAVAL 65

CONCIENTISACION

FAYA BO HAYA!

KPA ta haci un yamada na nos Comunidad
Ban celebra carnaval 65:

RESPONSABEL – RESPET - CONCIENTE





FAYA BO HAYA TA NA VIGOR

Ban cambia 0 tolerancia den 0 violencia
NO FAYA!

SERVICIO • INTEGRIDAD • SEGURIDAD









MINISTER ARMANDO LAMPE

Minister di Enseñansa, Ciencia y Desaroyo Sostenibel

INSCRIPCION PA 21+ TOETS NA IPA TA CERA DIA 1 DI FEBRUARI 2019

Bo kier haci e estudio pa Maestro di Enseñansa Primario of Bachelor Hulandes y no tin diploma sea di HAVO, VWO of MBO nivel 4 pero bo tin minimo 21 aña? Ata bo chens! Tur persona cu tin desde 1 di september 2019 minimo 21 aña y cu kier haci un estudio na IPA pero no tin e diploma cu IPA ta exige, ta bin na remarke pa haci e asina yama 21+ Toets. E 21+ Toets ta midi si un persona tin e nivel di HAVO y ta conta solamente pa estudionan inicial cu IPA ta ofrece durante aña academico 2019-2020, esta e estudio pa Maestro di Enseñansa Primario y Bachelor Hulandes.

E 21+ Toets lo tuma luga diasabra dia 9 di februari 2019. Si bo pasa e test aki cu exito, bo ta bin na remarca pa participa na un trayecto di preparacion pa e test di admision. Esaki lo tuma luga entre maart y mei 2019. E test di admision pa estudio di Maestro di Enseñansa Primario lo tuma luga fin di mei/ comienso di juni 2019. Esun pa Bachelor Hulandes lo tuma luga na mei 2019.

Tur persona cu ta interesa pa haci e 21+ Toets por pasa na Studenten Services di IPA entre 8or di mainta cu



12or di merdia y entre 1or cu 3.30 di atardi pa inscribi. Pa por haci esaki mester trece e papel di registro civil (papel di AWG 5,-) y AWG 75,- p'asina cumpli cu e gastonan di inscripcion. E ultimo fecha pa inscribi pa e 21+Toets ta 1 di februari 2019. Despues di e fecha aki no por inscribi mas pa aña academico 2019-2020.

Pa mas informacion por tuma contacto cu Studenten Services na 5243100 of por bishita nos pagina

di facebook 'Instituto Pedagógico Arubano' of nos website www.ipaaruba.com.





GOBIERNO DI ARUBA

AMPLIACION CANASTA BASICO

GOBIERNO
TA AMPLIA
CANASTA
BASICO

DI **11** PA
22
CATEGORIA

1200
PRODUCTO
PRIJS TA WORDO
CONTROLA

ACTUAL

1. Cuminda pa baby
2. Hariña di maishi
3. Te
4. Koffie
5. Lechi likido pa koffie
6. Lechi polvo
7. Aros
8. Azeta pa cushina
9. Lechi pa baby

PROME FASE: (Lo drenta na vigor na februari 2019)

10. Broccoli, Frozen
11. Spinashi, Frozen
12. Mixed vegetables, Frozen
13. Bonchi cora, seco
14. Bonchi preto, seco
15. Bonchi lima, seco
16. Tunafish,
den bleki, den awa chunk/flaked/grated
17. Sardin den bleki, den awa
18. Salmou den bleki, den awa

FASE 2: (Lo wordo anuncia despues)

19. Pasta, spaghetti
20. Papa havermout
21. Hariña
22. Lechi likido duradero den tetrapak of boter

GABINETE WEVER-CROES
TA PRIMINTI Y TA CUMPLI


MINISTER DANGUI ODUBER
Minister di Turismo, Salud y Deporte

CALIDAD DI CUIDO TA CONOCE UN OTRO PROGRESO CU INTRODUCCION DI 'KLACHTENREGELING' OBLIGATORIO

Desde inicio di gobernacion di Gabinete Wever-Croes 1 na 2017, Minister Dangui Oduber como mandatario encarga cu e cartera di Salubridad Publico a duna di conoce cu hisa e calidad di cuidu na Aruba ta un di su prioridnan. Awor den 2019 e calidad di cuidu aki ta conoce un otro progreso ya cu tur dunado di cuidu awor ta obliga di tin un 'klachtenregeling'.

Oduber, e idea ta pa di e forma aki e dunado di cuidu mes por haya sa kico ta bayendo robes. Door di scucha e pashent, por identifica e problemanan y drechanan.

E mandatario ta sostene e cambio aki den ley y ta invita tur persona cu mester di mas informacion pa acudi cerca IVA.



"Antes un pashent no por a vocifera facilmente cerca un dunado di cuidu su malcontento pa un servicio cu el a ricibi. Hasta si e por a entrega e keho, e dunado di cuidu no tabata tin niun obligacion pa resolve esaki", e mandatario a cuminsa ta bisa. Minister Dangui Oduber ta sigui splica cu desde 1 di januari 2019 esaki a cambia ya cu e ley di 'Calidad di Cuido' ta obliga tur dunado di cuidu pa tin un maneho di keho. E maneho aki ta wordo controla y supervisa pa Inspectie Volksgezondheid Aruba (IVA) y den caso cu no ta cumpli segun ley, IVA lo duna e dunado di cuidu un sancion conforme ley.

Segun Minister Dangui



MINISTERIO DI TURISMO,
SALUBRIDAD PUBLICO
Y DEPORTE




SCORE

E SERVICIO DI BO DOKTER
DI CAS CU E AZV RATING APP

DOWNLOAD

ESAKI RIBA
BO SMARTPHONE



scan
QR code to
download app



MINISTER DANGUI ODUBER: PRONTO TIN OPORTUNIDAD PA HACI ESTUDIO DI HBO DEN ENFERMERIA NA ARUBA MES

Dialuna 28 januari Minister di Salubridad Publico sr. Dangui Oduber hunto cu colega Minister di Enseñansa dr. Armando Rudy Lampe a reuni cu un delegacion di Zuyd Hogeschool. Zuyd Hogeschool conhuntamente cu diferente stakeholder na Aruba, lo bay ofrece e posibilidad di sigui y caba cu e estudio di HBO-verpleegkundige aki mes na Aruba.

Minister Dangui Oduber a duna di conoce cu e ta hopi satisfecho cu pronto Aruba por brinda su profesionalnan e oportunidad pa haci e opleiding di HBO-verpleegkundige aki na Aruba mes. Nan tin e oportunidad pa mehora nan mes profesionalmente, sin cu mester bandona Aruba. Esaki ta un otro paso den mehoracion di e calidad di e cuido pero tambe e seguridad di cada asegurado, esaki ta un di metanan principal pa e Ministerio di Salubridad Publico.

E estudio riba su mes lo ta riba e nivel di HBO y lo tin un duracion di 2 aña. Cu e estudio aki e enfermera/o di MBO nivel 4 por por specialisa den "ouderen zorg" y den "clinische zorg" pues un estudio multi disciplinario y hopi practico. Algo cu sigur ta hopi importante ta cu e estudio aki lo sincronisa cu esun di EPI. Na Aruba Zuyd Hogeschool lo bay traha hunto cu Universidad di Aruba specialmente cu e Faculty of Arts & Science (FAS).

Minister Dangui Oduber a trece dilanti cu e stakeholdersnan lo bay sondea e posibilidad pa cuminsa e estudio aki na Aruba pa September 2019 pero mester tene na cuenta cu inicialmente e ta planea pa cuminsa pa september di 2020. E mandatario a agrega cu e lo ta en espera di colega Minister



Lampe su aprobacion, pa asina sigui encamina e caminda pa pronto por ofrece e estudio di HBO-verpleegkunde na Aruba.

Finalmente Minister Dangui Oduber ta segura e comunidad

cu di e maneranan aki lo sigui haci esfuerzo pa mehora e calidad di cuido na Aruba. Mescos cu e AruBIG nos ta haci posibel pa trece mas yuinan di tera Aruba bek, cu e estudio di HBO den enfermeria

e enfermera/o tin e chens pa sigui specialisa su mes aki na Aruba. Asina nos ta trece bek e famia cu ta den exterior y nos ta duna esun cu kier studia e posibilidad pa hacie serca di su famia.



SIMAN PASA TABATA OTRO SIMAN INTENSIVO Y EXITOSO.

*Nos a habri siman cu e anuncio cu a amplia e canasta basico di 11 categoria pa 22 categoria y asina 1200 producto por wordo controla; Gobierno a priminti y Gobierno a cumpli.

*E di dos anuncio importante tawata cu tur pensionado ta sigui cobra e Reparatieoeslag di 125 florin. Banda di a aumenta e pensioen di biehes cu 42 florin pa pareha casa y cu 25 florin pa pensionado cu no ta casa, di a baha e tarifa di AZV, di a baha tarifa di belasting, e 125 florin aki ta un alivio financiero hopi bon pa nos pensionadonan.

*E siman aki empleadonan a cuminsa sinti e efectonan positivo di Reforma Fiscal ora a ricibi e payslip y mira cu e tarifa a baha. 30 mil persona no ta paga e belasting aki mas y pa 25 mil hende e tarifa ta baha.

*Siman pasa Prome Minister hulandes Mark Rutte tabata na Aruba. E por a mira pa su mes e avansenan cu nos pais ta mustrand y manera el a bisa, e tin confiansa den Aruba. *Premier Rutte a haya presentacion di e proyecto Gateway 2030 di expansion di aeropuerto, cu lo duna un empuhe den nos economia y crea cupo di empleo.

*Siman pasa a tuma luga na Aruba e cumbre di ministernan di husticia di Reino, JVO, den cual a firma varios protocol, entre otro esun di RST cu ta pone disponibel mas capacidad pa investiga corrupcion na Aruba.

*Secretario di Estado Hulandes Knops tambe tabata na Aruba y el a haya un presentacion di e Crisisplan Social. Nos a bishita centro OC y Casa Cuna pa e mes por mira e trabounan grandi cu nos ta haciendo riba tereno social.

*E 'highlight' di e siman sin duda tabata e celebracion di Dia di Betico. Nos a prepara hopi pa e dia grandi aki. Nos a bishita scolnan pa wak cuanto nos muchanan sa di Betico, nos a percura pa programanan na TV, radio y medionan social, nos a entrega un buki "Ken ta Betico" na tur scol, nos a organisa un competencia di pintamento cu a haya hopi bon acohida. Y e celebracion di Dia di Betico tabata un bunita dia. Desde mainta trempan te anochi, Aruba a conmemora un gran lider y a celebra nos dia nacional. Nos ta un pais bendiciona, ban ta hopi orguyoso di esaki. Danki pa demostra bo amor patrio.

Un fuerte abrazo, Evelyn

"Mi tin fe y confiansa cu e siman aki lo ta aun mas exitoso, cu logronan importante den bienestar di nos pais".

Prome Minister Evelyn Wever-Croes



GOBIERNO DI ARUBA

2019 | AÑA DI FAMIA Y CUIDO DI NOS MUCHANAN

HONOR Y DIGNIDAD

Semper a carga e confiansa
Semper a carga fe
confiansa den e mentalidad
Confiansa den e caracter
di nos pueblo
E pueblo di Aruba
E pueblo cu a salba su honor y dignidad
Y hunto a realisa nos libertad
Hobennan ban cuida y aprecia
Loke cu tanto sacrificio, astucia y determinacion
A keda logra
Y cu awe e ta nos realidad
Ban siña mas di dje
Ban siña conoce
Ban siña elogie
Pa su talento visionario
Su don special pa uni pueblo
Door di a crea nos simbolonan nacional
Y habilidad pa hisa sentimentonan patriotico
Mas cu tur cos ban realisa
cu no obstante nos diferencianan
Aruba completo mester para pa su lucha
Para y proteha su logro
Pasobra asina ta e unico manera
Pa nos mantene nos libertad
Y e mayor felicidad pa un y tur
Y nos futuro generacion
Cu honor y dignidad

Reflexion di Tai Kong Trimon
tocante Ken ta Betico y kico el a nifica pa pueblo di Aruba





GOBIERNO DI *ARUBA*

*un
Feliz Dia*

ISLAONLINE
PA INFORMACION
CORECTO Y BERDAD